

LENGHE FURLANE, ZOVINS E COMUNICAZION DIGJITÂL

Lis iniziativis de ARLeF a Friuli Doc 2023

ARLeF
AGENZIE
REGIONÂL
PE LENGHE
FURLANE

FRIULI·DOC

LA LENGHE FURLANE A FRIULI DOC 2023

Ti spietin domenie ai 10.09.2023 in Zardin grant

par doi apontaments:

aes 14.30:

Laboratori par fruts

"CE SNAIT CUN MAMAN!"



aes 16.00:

**Incuintri cui protagoniscj
di YOUPALTUBO e
TIC E TAC FURLAN**



Lenghe furlane, gjenerazions zovinis, mont dai social. Chest al è il focus dal program de ARLeF- Agenzie regionâl pe lenghe furlane par Friuli Doc 2023.

Lis iniziativis proponudis de Agenzie, che e ponte simpri di plui sul avignî de lenghe furlane cun progjets indreçâts ai fruts e ai zovins, soredu midiant des gnovis tecnologjiis, a son dôs. Il spazi "Aperitivo Io sono Friuli Venezia Giulia" in Zardin Grant, al darà acet al dopli apontament di **domenie ai 10 di Setembar**, in graciis de colaborazion salde cun PromoTurismoFVG.

Ancje tal cûr di Udin, in place San Jacum, dulà che al è il marcjât des ecelencis cui prodots gastronomicis e artesanâi "Io sono Friuli Venezia Giulia", al è l'Infopoint PromoTurismoFVG. Achì il public al podarà ricevi a gratis materiâi informatîfs e gadgets in lenghe furlane.

Il program al è chest:

LABORATORI MAMAN! PAI PLUI PIÇUI - domenie ai 10 di Setembar, aes 14.30 (si conse di notâsi scrivint a info@sportelfurlan.eu).

"Ce snait cun Maman!": Daria Miani, condutore de innomenade trasmission televisive par furlan pai fruts, e animarà il laboratori ludic didatic dedicât ai plui piçui. La lenghe furlane e sarà protagoniste di un zûc speciâl dedicât al mangjâ e il divertiment al è sigurât. A ducj i participants ur vignarà dât un regâl simpatic.

YOUTUBERS E TIKTOKERS FURLANS A FRIULI DOC - domenie ai 10 di Setembar, aes 16.00.

Spazi ae gjenerazion Z (ma no dome) cul event **"YoupalTubo e Tic e Tac furlan"**. Si fevelarà dai canâi YouTube e TikTok made in Friûl, tabaiant cui zovins youtubers di YoupalTubo (Lucia Bello, Federico Benedet, Davide Buccheri, Mattia Cantarutti, Desiree Chiappo, Francesco Colombino, Nicolas Fonzar, Federico Iob, Diego Scarsini, Fabio Valvason) e la tiktoker Greta Fabbro. A contaran cemût che e je nassude la lôr aventure digjitâl par furlan e ce che al sucêt daûr des cuintis. Cun di plui, a fasaran viodi i videos che ju àn fats cognossi e a rispuindaran aes curiositâts dal public.

Cun 54 videos publicâts, 3 milions di interazions, plui di 1 milion di visualizacions e 11 mil iscritti, **YoupalTubo**, il **canâl YouTube promovût de ARLeF**, al va indevant a cressi cence padin e i siei protagoniscj a son simpri plui cognossûts, sedi su la rê che fûr.

Nol è di mancul Tic e Tac Furlan, li che Greta e la sô gjate brasiliane Preta a proponin al public di TikTok induvinei linguistics, curiositâts, gramatiche in pirulis, tante simpatie e plui di cualchi efiet speciâl. Vuê il canâl, cun plui di 80 clips publicadis, al à passât i 14 mil followers, al à plui di 133 mil "mi plâs" e al à passe 13 milions di visualizacions.

La partecipazion de ARLeF a Friuli Doc e je un apontament fis di agns in graciis de colaborazion cul Comun di Udin; une ocasion significative par valorizâ la lenghe furlane te suaze de manifestazion enogastronomiche plui impuartante dal teritori.